

Suleqatigiissitamik immikkut ilisimasalinnik inuttaqartumik meeqqat atuarfiannik iluarsaaqqinnissamut kaammattuutitalimmik nalunaarusiortussamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanut tunngasunik kaammattuutit saniatigut nalunaarusiaq meeqqat autisemik; ADD/ADHD-mik annilaangasarnemillu nappaateqartunut sammisumik meeqqat atuarfianni immikkut ilinniartitsinernut neqeroorutitut kaammattuutit imaqassaaq. Nalunaarusiaq UKA 2025-imut atatillugu Inatsisartunut agguanneqassaaq.
(Inatsisartunut ilaasortaq Anna Wangenheim, Demokraatit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut siunnersuuteqartoq qujassuteqarfigaat, meeqqallu atuarfianni peqataatitsilluni ullumikkumullu naleqquttumik atuartitsinerup nukittorsarneqarnissaata pingaaruteqarnera akueralugu. Meeqqat atuarfiata siunertaani pingartinneqarnerpaat ilagaat, atuartitsinermi atuartut ataasiakkaat pisariaqartitaat isumagineqassasut, aammalu atuartitsinerup atuartut tamarmik ilikkariartornerat ineriartornerallu siuarsassagaa.

Aalajangiiffigisassatut siunnersuummi matumani Naalakkersuisut suleqatigiissitamik immikkut ilisimasalinnik inuttaqartumik pilersitseqquneqarput, meeqqat atuarfiannut innersuussutinik tamanut tunngasunik kiisalu meeqqanut immikkut ittumik pisariaqartitsisunut aammalu nappaateqartutut suussusersiffigineqarsimasunut immikkut ittumik perorsaanikkut neqeroorutitut nalunaarusiortussamik. Taakkua saniatigut nalunaarusiaq meeqqat atuarfiannik aqqissuusseqinnissamut inassuteqaatinik imaqassaaq. Siunnersuuteqartup siunnersuutaasa pingaartitaasalu ilaat Naalakkersuisut meeqqat atuarfiannut pilersaarutaanni ilaareerput. Naalakkersuisut meeqqat atuarfiannik nalilersuinissaminni tulliuuttumi sammineqartussat amerlanerit ilanngunniarpaat. Taakkununga ilaassapput atuarfiup aqqissugaanera, atuartitsissutit atuartitsissutillu tulleriissaartut, misilitsissutinut misilitsinnemullu piumasaqaatit kiisalu taakkua annertussuii.

Naalakkersuisut 2022-imi ilinniartitaaneq pillugu seminaareqartitsimmata nuna tamakkerlugu atuuttussamik Ilinniartitaanermut Siunnersuisooqatigiinnik pilersitsinissamik isumaq saqqummerpoq. Ilinniartitaanermut Siunnersuisooqatigiinnik pilersitsinikkut siunertarineqarpoq, siunnersuisooqatigiinnik sulinerminni allanut attuumassuteqanngitsunik aammalu inassuteqaatitigut ammasumillu tamat saqqumisumik oqallinnerisigut Kalaallit Nunaanni ilinniartitaanermi ataqatigiinnermik, peqataatitsinermik, pitsaassutsimik, naammassisaqarsinnaanermik aammalu naligiinnermik siuarsaanissaaq. Ilinniartitaanermut Siunnersuisooqatigiit pilersinneqartussaapput sulinissaallu aallartingajalerpoq. Siunnersuuteqartup pingaartitai pissusissamisoorutimik siunnersuisooqatigiit sulineranni

inassuteqaataannilu ilaatinneqassapput. Ilinniartitaanermut Siunnersuisooqatigiit ilinniartitaanerup iluani immikkut ilisimasalinnik suliamut attuumassuteqartunik ilaasortaqaassapput – taakkununggalu ilaassapput immikkut pisariaqartitsisut, taakkualu piginnaaneqarfifieriigaannik nappaateqarnerinillu suussusersiffigineqareersunik inuit immikkut ilisimasallit. Ilinniartitaanermut Siunnersuisooqatigiit pilersinneqarnissaannut ingerlannissaannullu aningaasat atugassat aningaasanut inatsimmi ilaareerput.

Naalackersuisut 2024-2030-mut Ilinniartitsinerup periusissiaminni aalajangerpaat meeqqat atuarfiata pitsaassusaanik nalilersuisoqassasoq. Taamaattumik Naalackersuisut 2025-imut aningaasanut inatsisissatut siunnersuummi konto pingaarnermi 20.11.70-imi Suliniutinut nutaanut sillimmatini aningaasaliissutinik immikkoortitsisimapput. Nalilersuinissamut sinaakkutissat inaarneqassapput suliasamut aningaasaliissutit 2025-mut aningaasanut inatsisissap Inatsisartuni akuersissutigineqarneratigut naammassineqariarpat.

Qularutissaagunangilaq Ilinniartitaanermut Siunnersuisooqatigiinni immikkut ilisimasallit ilaasortaalersussat aammalu meeqqat atuarfiannik nalilersuinerup ilaasortaajumaartut inuit taakkuusussaasut. Taamatuttaaq aamma naatsorsuutigineqartussaagunarpoq, Ilinniartitaanermut Siunnersuisooqatigiinni meeqqallu atuarfiannik naliliinerup apeqqutit pingaartitallu suliarineqartussat, siunnersuuteqartup tunngavilersuinerup ilanngussai, soorlu immikkut ilinniartitsinerup neqeroorutit, alloriarfinni misilitsinnerit, atuartitsinerup pitsaassusaa, ilinniakkat qaffasissusaannik nukittorsaaneq ilinniartitsisullu ilinniagaqaqqinnissaannut periarfissat ilaatinneqarumaartut. Siunnersuuteqartup siunnersuutigisaatut immikkut ilisimasalinnik suli pilersitseqqittoqassappat, immikkut ilisimasallit pineqartut, pingaartit pineqartut asserluinnaannik saniatigut suliakkeqqinneqarunik suliakkorsorneqartorujussuussapput. Taamaattumik immikkut ilisimasalinnik suli pilersitseqqinnissaq siunnersuutigissallugu nangaanartoqarpoq. Marloraammik suliqaarnissaq pisariaqanngilaq.

Meeqqat nappaataannik suussusersiffigineqareersut imaluunniit immikkut allatut ittunik pisariaqartitsisut eqqarsaatigalugit Naalackersuisut 2024-2030-mut Ilinniartitsinerup periusissiaminni allaaseraat, atuartunut taakkununga suliniutit siunertalerneqarlutillu tulleriissaarneqassasut. Taakkunani siunertarineqarpoq meeqqat nappaataannik suussusersiffigineqareersut imaluunniit allatut ittunik immikkut pisariaqartitsisut sapinngisamik pitsaanerpaamik neqeroorfigineqarlutillu periarfissaqartinneqassasut.

Naggataatigut oqaatigineqassaaq, Naalackersuisut neriuutigalugulu kissaatigigaat, siunissami qaninnerup ilinniartitaaneq pillugu politikkikkut simmasissumik isumaqatigiittoqarumaartoq, pineqartumi, meeqqat atuarfiat ilanngullugu, aalajaassuseq, attassuarneq eqqissisimanerlu pilersikkumallugit, atuarfiit pisortaannut, atuartitsisunut, atuartunut angajoqqaanullu iluaqutaassammata. Ilisimatitsissutigineqassaaq isumaqatigiissuteqarnissamut suliniutit siulliit aallartinneqareermata.

Taaneqartut patsisigalugit Naalackersuisut siunnersuutip itigartinneqarnissaa inassutigaa.